

28.  
30  
Q. D. B. V.  
DISSERTATIO INAVGVRALIS PHYSICO · MEDICA  
SISTENS

# ORYCTOGRAPHI- AM HALENSEM

SIVE

FOSSILIVM ET MINERALIVM IN  
AGRO HALENSI DESCRIPTIONEM

<sup>2<sup>VA</sup>M</sup>  
PRÆSIDE

DN. FRIDERICO HOFFMANNO

FACVLTATIS MEDICÆ SENIORE

& h. r. DECANO

*Ad d.*

*Aprilis MDCCXXX.*

PRO

GRADV DOCTORIS

SVMMISQVE IN MEDICINA PRIVILEGIIS RITE IMPETRANDIS

H. L. Q. C.

Publicæ disquisitioni exponet

AVCTOR RESPONDENS

IOANNES IACOBVS LERCHE

POTSDAMIENSIS.

---

HALÆ MAGDEBVRGICÆ

Typis JOH. CHRISTIANI HILLIGERL Acad. Typogr.



THE STATE OF NEW YORK  
IN SENATE  
JANUARY 1872

REPORT  
OF THE  
COMMISSIONER OF THE LAND OFFICE

IN RESPONSE TO A RESOLUTION  
PASSED BY THE SENATE  
MARCH 1871

ALBANY: J. B. LEECH, STATE PRINTER.

1872.

THE STATE OF NEW YORK  
IN SENATE  
JANUARY 1872

REPORT  
OF THE  
COMMISSIONER OF THE LAND OFFICE

IN RESPONSE TO A RESOLUTION  
PASSED BY THE SENATE  
MARCH 1871

ALBANY: J. B. LEECH, STATE PRINTER.

1872.



VIRO ILLVSTRI ATQVE EXCELLEN-  
TISSIMO

D O M I N O

FRIDERICO HOFFMANNO

COMITI PALATINO CAESAREO

CONSILIARIO MEDICO ET PROFESSORI REGIO

SOCIETATIS SCIENTIARVM CÆSAREÆ REGIÆ

BRITANNICÆ ET BORVSSICÆ

SODALI

PATRONO AC PROMOTORI SVO

OMNI HONORIS ET OBSERVANTIÆ CVLTV PROSE-  
QVENDO

NEC NON



VIRO PLVRIMVM REVERENDO ET  
AMPLISSIMO  
D O M I N O  
M. IOANNI CHRISTIANO  
LERCHE

LEGATIONIS POTENTISSIMI REGIS

SVECIAE IN AVLA SACRAE CAESAREAE  
MAJESTATIS ECCLESIASTAE FIDELISSIMO

FRATRI SVO PARENTIS LOCO

OFFICIOSE AC PIE COLENDO

DISSERTATIONEM HANC

IN

SEMPITERNAM SVMMORVM BENEFICIORVM  
MEMORIAM

ET GRATISSIMI ANIMI DOCUMENTVM  
CVM VOTO

OMNIGENAE PROSPERITATIS  
GRATIAEQVE DIVINAE  
REVERENTER OFFERT

ET

OMNI ANIMO CONSECRAT

· AUCTOR.





## PROOEMIUM.



Vamvis thema disserta-  
tionis præsentis magis ad phy-  
sicum, quam medicum forum  
spectet; illud tamen spe-  
cimini inaugurali non plane  
incongruum esse puto, cum  
Physices studium ad Medicinam  
maxime pertineat, & in ea vsum amplissimum ha-  
bere obseruetur, de quo ipsa hæc tractatio satis cla-  
rum exhibebit testimonium. Si libros Physico-  
rum euoluimus, non pauci inter eos occurrunt, qui  
specialius de fossilibus certarum regionum scripse-  
runt. Horum singularis industria me quoque per-  
mouit, vt in perscrutandis ejusmodi rebus natura-  
libus multum temporis impenderem. Hunc in fi-  
nem ager Halensis vberissimam præbuit copiam, ita  
ut præterlapsis annis magnum variorum fossilium  
apparatum conquisiuerim. E quibus cum plurima



multis adhuc incognita sint, operæ pretium iudicavi, hac occasione *fossilium Halensium enumerationem* pertractare. Sed ne limites dissertationis transgrediar, in recensione quorundam subjectorum breuior ero: quæ vero rariora & notabiliora erunt, pluribus circumstantiis describere non negligam. Cui conatui & labori, sicuti gratiam diuinam adjutricem precibus deuotis exoro, ita confidenter eandem mihi promitto.

## CAPVT. I.

De

### Situ & natura agri Halensis.

**D**Vm animus est, fossilium & mineralium in agro Halensi descriptionem exhibere, supervacaneum hoc loco esset, in urbis Halæ Magdeburgicæ denominationem, originem, antiquitatem & incolas præteritorum seculorum inquire. Qui vero de his certiores esse volunt, hos ad *OLEARI Halographiam* & *ANONYMI* cujusdam *Nachricht von der Stadt Halle und Vniuersitat*, remittimus. Per agrum Halensem itaque non solum angustum illud spatium, quod proxime urbem ambit, sed passim etiam ad distantiam trium & quatuor milliarum porrigitur, intelligo.

*Solum* hoc nostrum plurima ex parte terra nigricante, pingui gaudet, ob quam præ multis aliis fertilis-



tilissimum existit. Excipio pauca tantum jugera parumper lapidosa & arenosa, quæ versus amnem Elystrum, die Elster, & prope pagos Siebichenstein & Niedleben, occurrunt.

Licet ager quoad maximam partem planus sit; passim tamen quoque *montibus & vallibus* distinctus conspicitur. Ex montibus inprimis eminent mons St. Petri, Petersberg, & qui Landsbergæ est, deinde qui prope Siebichenstein situm habent. Ex vallibus annotari merentur, quæ ad pagos Beesen, Espersstädt & Gimnritz in via VVettinensi obveniunt, ubi simul jucunda vocis repercussio, quam Echo appellant, frequentissime exauditur.

*Sylvis* etiam non destituti sumus. Sic habemus syluam, quercus maxime comprehendentem, quæ a pago Almendorff, secundum longitudinem ad ripas Elystri, vsque ad Lipsiam & ultra, continuat. Alia quercus ferens, sed longe minor, est ad radices prædicti montis St. Petri. Deinde non procul ab urbe nêmus oculis se offert, quod præter quercus etiam pinos, abietes, alnos, betulas, corylos & alios fouet frutices. Verum omnis hic sylvarum apparatus tanti non est, vt debitam quotannis ligni copiam nobis suppeditaret. Hanc inopiam vero sylua nostra subterranea, carbonēs fossiles puta, qui prope Wettinum & Lebeguinum copiosissime eruuntur, egregie subleuat. At hi etiam cum omnibus vsibus æconomicis non quadrent; lignum insuper aliunde, partim ex Thuringia, Salsæ fluuiο injectum, ad nos

vena



valtale propellitur, partim autem ex Principatu Anhenino Dessauienſi, naui & curru, in ſufficiente quantitate advehitur.

*Vinearum* proxime ad urbem paruus eſt numerus, longe maior vero vnum vel alterum abhinc miliare, prope Cölme & Seeburgum; vbi vinum, licet ignobilius, ſatis copioſe paratur.

Hic a propoſito noſtro non alienum iudicamus, ſi agri Halenſis diuerſa ſtrata ſubterranea, quouſque haecenus innotuerunt, ſubjungamus, ex quibus quiſque veritatis amicus ad diluuium quoddam vniuerſale conſuſionem formare poterit. Huic ſcrutinio ſubjiciemus primo campos ad meridiem vergentes, qui ſequentia ſtrata habent: 1) primum eſt humus alens nigricans, vnius circiter & dimidia vlnæ: 2) alterum ſilices & lapides variū generis habet, ſed inordinate compoſitos, perinde fere, ac ſi viam ſaxis ſtratam cerneret: 3) ſequitur limus purior & ſiccus, *Backofen-Leimen*, trium vlnarum. 4) Limus ordinarius humidior, cum lapidibus corneis, ut plurimum diffractis, quatuor vlnarum. 5) Limus ſtriatim poſitus, *Blätter-Leimen*, vnius vlnæ; 6) arena ſicca impurior, vnius vlnæ. 7) Limus valde arenofus, quatuor vlnarum 8) Limus compaſtior, fuſci coloris, dimidia vlnæ. 9) Silices maiores minores, & diuerſi coloris, *Waſſer-Rieſ*, cum aqua pura interfluente; & hæc aqua illa eſt, quæ per cuniculos & canales ligneos, *durch Stollen und Röhren*, ad orphanotropheum derivatur: eſt vero  
hoc



hoc stratum quatuor vlnarum. 10) Excipit terra nigra compacta XII. vlnarum, quæ pyritem martialem vitriolicum, lapides corneos magnæ molis, particulas ligni fossilis fusci, pectunculos & alia conchylia, vestigia cretæ purissimæ & varia fragmenta fouet, de quibus infra plura dicemus. Quin totum hoc stratum principio vitriolico scatet. Quidam vero agricolarum hanc terram pro nitrosa forte habentes, eam per agros suos pro meliore fœcundatione distribuerunt; sed spem desideratam non obtinuerunt, ac potius agri vitriolico principio steriliores redditifuerunt, quod in illis adhuc hodie obseruatur: 11) Arena sicca, fusci coloris, duarum & plurium vlnarum. 12) Argilla alba & rubicunda. 13) Tandem lapidis arenarius, ruber & albicans. Et hucusque, ad LX. circiter vlnas, terræ scrutatores penetrarunt.

In eodem agro versus Salam hæc strata discrepant: primo enim terra nigra; deinde mox argilla alba, vel etiam rubicunda apparet, vti in suburbio auf dem Berghen. Seide videre est: huic subjacet lapis durissimus, crystallis minoribus sæpe ornatus; tum flaua terra compactior, margæ instar,prehenditur.

In campis occidentem spectantibus eodem modo se habent strata, dum statim humum alentem argilla copiosissima sequitur. In agro quoque septentrionali & occidentali parua est differentia, nisi quod limus ordinarius argillam prius antecedit.

In vrbe ipsa autem, in primis ejus parte merid-



dionali, telluris alia est varietas. Superius plerumque terra nigra, limus, lapides varii, & præsertim arenarius, porosus, albicans, occurrere solet: sub quibus latet peculiare stratum, carbonum nempe fossilium, vulgo *Ehau-Kohlen*, quod longe lateque se extendit, ac non solum magnam vrbis & suburbii partem, den *Stein-Beg*, occupat, sed passim quoque per campos, versus meridiem, vsque ad pagum *Liebenau*, continuat; vbi in puteis fodendis sæpissime eruuntur. Placet de hoc plures circumstantias communicare. Anno circiter MDCXCIIIX. in area vrbis, auf dem *Berlin*, metallifossiores veros lithantraces quæsiuerunt; sed nihil, nisi prædictos carbones inutiles, eruerunt. Postea de nouo anno MDCCXXII. hunc in finem terram in fossa meridionali, non procul a Pædagogio Regio, perscrutabantur: reperiiebant itidem hos carbones, quorum superius stratum varia fragmenta friabilia, wie verfault *Reiß-Holz*, offerebat, cum intermixtis arborum foliis, optime adhuc conspicuis. Deinde circa vlnam XIV. & XV. integros arborum truncos secundum seriem positos offendebant, qui non nisi lignum fossile, fuscum, valde compactum erant, ex quibus etiam maximum frustum ad curiam deferabatur. Porro ab vlna XV. vsque ad XXVI. carbones nostri bituminis instar, nigri coloris copiosissime sequebantur. Sed accidit, vt, foramine per terebram, *Erdböhrer*, ad XXVI. vlnam facto, aqua subterranea subito instar fontis salientis ad viri altitudinem prorumpens, ca-



uernam ad vltimam XVI. repleret, vt foſſiores media nocte auferre & a toto opere deſiſtere cogerentur: aqua hæc vero, quorum veſtimenta commaculauerat, ſucceſſu temporis corroſit, ex quo videmus, illam de vitriolico principio participaffe.

Singularis huius ſtrati jam ante ducentos fere annos mentionem fecit VALERIUS CORDVS in *ſylua obſeruat.* vbi dicit: *Bituminofa terra lenis, arida, & quæ nunquam lutum fit, etiam imbribus maximis, & quæ accenſa, ardet carbonum modo, donec in cinerem ſoluatur tota, odore dum ardet bituminis ſulphurei mixti, Halæ Saxonie, ſub ipſa vrbe, maxime autem in foſſa verſus meridiem, reperitur.* Quidam exiſtimarunt, hos carbonēs, quos unreiffe Stein-Kohlen appellare malunt, poſt temporis interuallum XX. vel XXX. annorum, ad debitam maturitatem peruenturos fore, vt veros tandem carbonēs foſſiles conſtituant. Sed cum ex citato auctore manifeſtum ſit, eoſdem carbonēs, quos ille bituminofam terram vocat, tempore duorum fere ſeculorum eaſdem qualitates adhuc retinuiſſe, & nullam mutationem ſubiſſe; hinc maxime dubitandum, an vnquam deſideratam metamorphoſin ſintpaſſuri.

Plura hic non addimus, cum longe alia ad ſcopum noſtrum magis pertinentia reſtent.



## CAPVT II.

De

## Terris medicis &amp; mechanicis.

**N**on necessarium iudico, omnes terrarum species agri nostri, quæ ex antea prolatis maximam partem constant, hic pluribus enarrare; sed sufficiet, si mechanicas tantum & medicas allegauero. Has inter primo loco annotanda venit *argilla*, quæ hic in abundantia prostat. Differt autem argilla ratione coloris; alia enim est alba, quæ frequentior, alia rubra & purpurea, alia cinerea & cœrulea, quæ paulo rarior. Dein differt quoque ratione puritatis. Sic argilla ex fodina proxime ad urbem, parumper arena permixta est, quæ conficiendis vasis fictilibus, & præcipue etiam fistulis tabaci inseruit. Multo purior autem ea deprehenditur, quæ vix ante decem annos in media sylva, prope pagum *Niedleben*, detecta est. Hæc illud singulare habet, quod tam propter puritatem, quam etiam eminentem albedinem, ad purificanda panna a fullonibus loco saponis vsurpetur, & hunc in finem interdum ad alia loca transportetur. Argillæ vsus in Medicina valde infrequens est, & licet virtutem absorbentem & exsiccantem habeat, præstantiora tamen huius generis remedia alia exstant. Ceterum hoc semper de argilla mihi notabile fuit, quod non facile, nisi forte in superficie, lapidibus figuratis ac aliis hete-



heterogeneis permixta occurrat, ex quo haud immerito conjiciendum, illam a diluvio plurimis in locis intactam esse relictam.

*Rubrica fabrilis*, prope Siebichenstein, in via, mox in superficie, ante paucos demum annos deprehensa est. Hæc ut plurimum saxo grysei coloris adhæret, ex quo etiam magnam duritiem acquirit, ob quam ordinariæ rubricæ multo inferior est. Interim tamen novi, quosdam Mechanicorum illam in usum duxisse. Rubrica alias pollet adstringendi, reprimendi & fluxum sanguinis sistendi facultate; unde & in ipsa vulgus communiter in dysenterici curatione sibi leuamen quærit, in quo cum hæmatite multum convenientiæ habet.

*Ochra* in lapicidina, ad Salæ fluvium, non modo haud procul ab urbe, post humum nigrificantem mox in altero strato conspicitur, sed etiam in arvis prope pagum Seeben, quibus locis a figulis sæpe quæritur ac eruitur. Datur quoque ochra factitia, quæ ex plumbo nigro paratur, dum nempe hoc ignis vehementiæ tam diu committitur, donec colorem ochræ contraxerit. Vid. HOFFMANNVS in *Clave Schræder*. p. 136. Ochra vero nativa ysta, rubricam factitiam constituit, de qua vid. AGRICOLA *Lib. III. de ortu & causis subt.* p. 40. CÆSIUS de *mixeral.* *Lib. 2. c. 2. sect. 3.* Pictoribus & chirothecariis ochra maximi usus est: a Medicis vero parvi æstimatur, quia vis caustica & exsiccans ex aliis subjectis longe efficacior habetur.



*Creta*, cuius mentionem in antecedentibus jam feci, non tantum lapidibus corneis in allegato strato repertis copiose adhæret, sed passim quoque seorsim peculiaribus frustis eruitur. Quid in mechanicis creta præstet in vulgus satis notum est. In medico foro haud inglorium ejus nomen est inter absorbentia & exsiccantia remedia, ideoque commendatur maxime in soda & bilis acrimonia; hinc etiam basin constituit morsulorum diacretæ Mynsichti. ERTMÜLLERVS cretam ad drachmam cum vino exhibitam, tanquam palmarium remedium ad necandos vermes, laudat. Externe in vlceribus, hæmorrhagiis & podagra conducere perhibetur. Sed cum, testante experientia, in omnibus his casibus plus noxæ, quam emolumenti afferre soleat, ejus vsum largiorem non immerito dissuadeo.

*Lac lunæ*, terra lenis & friabilis candidissima, ante paucos annos in horto medico Pædagogii Regii passim eruta est. Cum alias noto sic dicto lacte lunæ in omnibus conuenit, ac lapidi calcareo nunquam firmiter adhæret. Ob terram teneriorem in affectibus quibus cretam mederi perhibent, tutius adhibetur, ac præterea cum crystallo montana præparata mixtum, lac puerperarum augere, neque minus in febribus malignis, ardore vrinæ & calculo prodesse dicitur; quod tamen experientia nondum sufficienter confirmatum est.

Si extra terminos agri nostri paululum vagari licet, *terram sigillandam* quoque, ex luteo-puniceam, licht.

lichtbraun, pinguem & purissimam, prope Numburgum, in vineis, quinque ab vrbe nostra milliariibus, inuenimus, cuius varia specimina Museum curiosum *Magnifici Dn. PRÆSIDIS* exhibet. Hæc terra notis bonitatis aliis non facile cedit. Nam I.) pinguis est & levis, omni sabulo & arena destituta; II.) Leuiter manducata, butyri instar liquefcit; & III.) etiam linguæ adhæret. Propterea æque ac aliæ terræ figillatæ, Strigenfis, Lemnia, Melitenfis, Samia, in vsum medicum trahi potest. Harum autem virtutes deprædicantur alexipharmaca, diaphoretica, adstringens, quæ a manifestis illis qualitatibus deriuanda: a pinguedine scilicet, qua simul acridinem involuunt; ab adstrictione leni, qua fibras relaxatas adducunt; a porositate, qua aquosum humorem absorbent; a miscela principii martialis, quo vtplurimum hæc terræ imprægnatæ sunt. Sed si Practicos consulamus, singulari illa virtute alexipharmaca eas destitutas esse asserunt, ob quam vulgo in venenis subigendis, febribus acutis, & conjuncta iis diarrhœa, aut dysenteria maligna, extolluntur.

### CAPVT III.

De

Lapidibus nulla certa figura præditiis.

**J**Am propius ad ipsam lapidum descriptionem venio, & secundum ordinem hoc capite primo



mo loco non figuratos examinabo ; e quibus nonnullos quidem infimæ sortis, ut saxum, varii generis, filices, corneos lapides ; omittere potuissim, sed vt titulo exacte satisfiat, tamen eorum tantum mentionem hic injiciam. Si quis autem metallicos etiam lapides, siue sic dictas mineras, quæ pariter certam non obtinent figuram, in hunc censum referendas esse arbitretur ; ego quidem non dissentiam, sed quia earum consideratio majoris momenti mihi visa, peculiare caput de illis conscribam.

*Saxi arenarii* tres singulares species habemus. Primum est *Loderslebenense*, fusci & cinerei coloris, ex quo cotes aquariæ, *Schleiff-Steine*, columnæ pro ædificiis, statuæ diuersæ magnitudinis & monumenta sepulcraria formantur. Dein *Esperstadiensense*, coloris ordinario grysei & subcinerei, interdum & flauï & cœrulei, quod substantiæ tenerioris & firmioris est, eaque propter non solum ratione vsus cum priorî conuenit, sed insuper etiam, ( quod polituram recipit ) ejus tabulæ quadratæ, *Platten*, prosternendis procerum atriis, ad remotiores vrbes sæpe vehuntur. Postea vero non minus notabile est *Rotenburgense* saxum, ex pallido rubrum, omnium durissimum : e quo cæduntur lapides molares multi & magni, ac Berolinum, in Porussiam aliaque dissita loca inde transportantur.

*Saxum* aliud *glareosum* se offert ad Salæ ripas, non procul a molendino, bey der Stein-Mühle. Hoc lapillis rubicundis, cinereis, viridibus & quasi  
sele-



seleniticis vndique refertum est, qua de causa nitet ac splendet instar micæ sterilis. Hujus vsus frequentissimus est in exstruendis ædificiis, & sternendis saxo plateis.

*Saxum calcarium* non minori in copia reperitur prope pagum Liscau, ex quo in laterinis violentia ignis diu cremato, calx viuâ paratur. Curiosum in hoc lapide est, quod ejus superficiei varia conchyliâ inspersa sint, de quibus postea. Frideburgi quoque ex tali saxo calx vritur, quæ subtilior & ad dealbandos parietes conuenientior est priori; quare & hunc in usum ad nos transportatur. Medicus calcis viuæ vsus non est contemnendus. Nam confecta ex ipsa aqua calcis viuæ, in externis multis corporis humani affectibus, egregie prodest, vt in vlceribus venereis, ambustis, tumoribus œdematosis simplicibus, & bubonodeis, non valde duris; in paralyâ vero, doloribus spasticis, non æque conuenit. Spiritus dein calcis viuæ, tanquam singulare diureticum, ad calculum, tam renalem, quam vesicalem expellendum, summum a quibusdam habetur arcanum, neque minus ad podagram tollendam laudatur; sed speratum auxilium hætenus nondum præstitit certo ac tuto.

Accedo ad *lapidem tophaceum*, cujus varia specimen se mihi obtulerunt. Primum prope Liscauium, Passendorffium & Quersfurthum, in eleganti forma, musci instar petrefacti; alterum prope Islebiam, fungi figuram referens, sæpe cochleis vmbilica-



licatis nondum petrefactis prægnans ; hocque Sangerhusæ, grossius contusum, ad liquationem & fusionem falicitandam cupri mineris additur. Tertium inuenitur Frideburgi, quod cum priori fere conuenit. Jo. KENTMANNVS in *Nomenclatura fossilium* p. m. 38. meminit tophi ex cinereo flauo Halensis ; sed cum locum natalem ejus accuratius non indicauerit, affirmare non possum, an vnus ex allegatis fuerit.

Jam *marmoris species* recensendæ erunt. *Giebschensteinense* duplex est: vnum coloris est grysei, vel etiam fusci, venis rubicundis & carnei coloris passim distinctum, propter quas in tabulas redactum & cotè læuigatum, jucundum oculis exhibet spectaculum. Ante octo & plures annos aliquoties maxima frustra hujus marmoris naui Berolinum transportata fuere: posthæc vero nihil amplius effossum est, quod partim valde durum, neque instrumentis facile cedit, partim etiam quod venæ ejus coloratæ rarius occurrunt, quæ tamen præcipuam illi elegantiam conciliant. Alterum coloris flauo est, instar ochræ, & striis longitudinalibus ac circularibus gaudet, vt crederes, lignum nucis juglandis petrefactum esse, de quo varia specimina ostendere possum. Marmor *Querfurtense* ex lapacidina auf der *Rudenburg*, colorem habet gryseum, sed innumeris subinde concharum speciebus, sapissime crystallifatis, refertum conspicitur. Nonnulli quidem hunc lapidem ad calcareos referunt, at propter substantiam durissimam, polituram quoque optime admittentem, inter marmora referre malui.

*Alabastrum* in agro Halensi ordinarie non offenditur, per fragmenta autem noui, ex strato decimo, nigro, *Cap. I.* nonnunquam protractum esse. Si vero ad quintum ab vrbe lapidem excurrere licet, *Alabastrum album* & variegati coloris, striis rectilineis & serpentinis pulcherrime ornatum reperimus, in maxima copia, nempe Bottendorffi, non procul ab oppido *Wiehe*. *Alabastrum* per se ad monumenta varia inde conficienda aptum est; sed vstum, gypsum reddit, quod ad efformandas imagines, & effingendos memoriales nummos, *Medailen abzugießen*, a gypsariis vsurpatur. In re medica parui est momenti: prostat tamen ex hoc vnguentum, *alabastrinum* dictum, contra capitis dolores, vt & *cataplasma hypnoticum* D. D. R. in *HOFFMANNI Thesauro pharmac.* descriptum. Curiosum experimentum ex BOYLEO Excellentissimus Dn. JO. JAC. BAIE-RYS in *Oryctogr. Norica* p. 26. allegat; quod nempe pulvis alabastris aut gypsi Parisiensis, æneo ferreoue lebeti, prius percalefacto, inditus, gradatim aucto igne, incipiat liquoris bullientis modo vndulare, effervesce, magnamque vaporum copiam spargere, tametsi nec ante, nec inter, nec post ebullitionem istam, pulvis alabastris humidus reuera fuerit.

Frequentius apud nos est *spatum, siue gypsum*; Prostat id Cölmæ ad falsum lacum, & Martisburgi, vbi vulgo pro marga, *Stein-Marf*, habetur, ac priori loco reperiundum, crystallos sæpe transparentes, quod raro accidit, exhibet. Minoribus frustis et-



iam ex arenofodina Schrapelauienſi, ex agro noſtro, prope vineam, vor dem Steinweg, interdum eruitur, quæ ſpecies aſbeſto filamentolo haud diſſimiles ſunt. Ex ſpato in Thuringia calcem viuam, Spar-Kalk, præparant, & alias etiam ex eo, ſi vritur, gypſum proprie ſic dictum fit. Vſum mechanicum paullo ante jam notavi; quoad medicum autem, ſpatum ſubtiliſſime pulueriſatum, a plebejis in dyſſenteria & aliis alui fluxibus, item in hæmoptyſi &c. adhiberi ſolet; ſed præpoſtero ſape effectu, & potius ex foro medico relegandum.

*Glacies Mariæ, Frauen-Eiß, Marien-Glaß*, a ſpato in eo tantum diſfert, quod pellucidior & purior ſit: eaque propter combuſta pari ratione largitur gypſum. In fodiendis puteis veſtigia ejus manifeſta in conſpectum venerunt ante aliquot annos, in vinea *Magnif. Dn. Cancellarij de LVDEWIG*, vt & in Xenodochio in ſuburbio, zu Glaucha. Majori tamen in copia offenditur Numburgi & Bottendorff. Naturæ curioſi hunc lapidem fiſſilem commodiſſime vſibus ſuis ita adaptant, ut inter duas laminas papiliones includant, & ſic aëris acceſſum impediendo, eos non ſolum a putredine vindicent, ſed & ex vtroque latere colorum varietatem egregie oculis & aſpectui exhibeant, cujus varia ſpecimina Ruſſica exotica *illuſtr. Dn. PRÆSIDIS Muſeum* fouet. Veteres ex hoc lapide ſpeculari feneftras formarunt, vti reſert KENTMANNVS *loc. cit. p. 32.* Et AGRICOLA ſuo adhuc tempore in templo vetuſto Martisburgi ejusmodi

modi fenestras offendit. confer. SCHÜTTEL *Oryctogr. Jenens. p. 60.* Pœminis pulvis ejus pro cosmetico est; aliis vñibus medicis rarius servit, nisi quod externe in oculorum caligine, & si pellicula apparet, in subtilissimum pollinem redactum, ab aliquibus cum fructu inflari soleat.

Addo *silices* plurimis agris passim insperfos, nulli vero copiosiores & coloratiores, quam ad pagum *Niedleben*, circa arenifodinam, quorum adspectus curiosiores maxime oblectatur. *Silices albi* & quodammodo pellucidi, in officinis ærariis metallifodinarum recipiuntur ad fluores, vulgo *Stüsse*, quibus minerarum fusio acceleratur; vel etiam subtilissime contusi smaltæ præparationi inseruiunt. Chymici ex silicibus calcinatis & plumbo vitrum saturni conficiunt. In medicum vñum cedit tinctura nephritica *Amelungii*, ex his silicibus parata, quæ calculosis leuamen adferre dicitur. Alii eodem scopo silicibus ignitis vinum generosum aliquoties affusum mirifice commendant. Ne dicam, Chirurgum quendam, *BALTH. KAVFFMANN*, scriptum de silicibus divulgasse, in quo oleum ex silicibus productum tanquam polychrestum in plurimis morbis laudibus effert. Sed omnibus his commode possumus carere.

Transeo ad *lapides corneæ*, a *BÜTTNERO* ita denominatos, vulgo *Feuer-Steine*. Hos si ex imis terræ visceribus eruimus, vbi nullam vim externam passi, plerosque quidem integros adhuc, varie figuratos videmus; non tamen pauci etiam occurrunt, qui in



circumferentia, aut per medium, diffracti sunt; qui habitus sine dubio ex diluuiio vniuersali habet originem, quo hi lapides vario modo allisi in fragmenta dissilierunt. Verumtamen inde non evictum, aut concludendum, omnes lapides corneos ante diluuium jam exstitisse, sed credibile est potius, post illud demum plures ex materia fluida coaluisse, quia inter illos reperiuntur, qui intus per totam substantiam coralliis fossilibus, lapidibus Iudaicis & echinitis etiam, licet rarius, referti sunt atque prægnantes. Ceterum quum hic lapis nonnisi silex verus durissimus sit, plura de ejus vsu non disseram.

Tandem etiam hisce lapidibus annumero *Jaspidem*, sanguineo colore tinctum, qui passim in aruo nostro prouenit, sed minoribus fragmentis. Ignis ex eo copiose elicitur, quare non incongrue *rother Steiner* appellatur. Vsus ejus, vbi in copia est, satis cognitus; in Medicina autem parum præstat.

## CAPVT IV.

De

### Lapidibus ex lusu naturæ & vegetabilium ac animalium mutatione figuratis.

**C**Um denique de ipsis figuratis lapidibus acturus sim, prius præmittam illos, qui naturæ lusu figuram quandam, similem vegetabilibus, animalibus

malibus & aliis corporibus acquisierunt, non constanti naturæ lege, sed fortuito & accidentaliter. Hinc petreæ & eorum sibi similium magna inuenitur copia, sed figuratorum raro bina exacte sibi respondentia specimina reperiuntur. Inter hæc refero *silices* in agris & Salæ fluuio occurrentes, quorum multi varias figuras mathematicas repræsentant; aliqui enim sunt rotundi, alii conici, alii oblongi, alii ouales, aut plani, alii porro pyramidales aut polygони.

Ex omnibus his annotari meretur *Ætites*, der Adler-Stein, qui rotundam & globosam figuram habet. Externe scaber & colore varius est, alium lapillum continens, vnde concussus, crepans resonat. Inuenitur, sed rarius, prope arenofodinam Halensem & ad lacum salinum Seeburgensem. Frequentior autem est altera ejus species, quam *Geodem* appellamus, qui terram qualemcunque intus fouet. Præter hos vero prope citatam fodinam peculiaris copiosissimeprehenditur lapis, figuræ nempe globosæ, cylindricæ, conicæ, oualis & oblongæ, crustæ ex flauo rubicundæ, ita, ut minus nonnulli eorum exacte placentulas, vulgo Pfann-Ruchen, mentiantur: malleo autem diffracti, omnes arenam albicantem cum flauescente mixtam offerunt. In Medicina huic lapidi variæ virtutes, tribuuntur, sed cum superstitionis relationibus superstructæ sint, ejus vsu penitus carere possumus. Ac licet ad abortum præcauendum, partum facilitandum, & foetum mortuum expellendum, tanquam amuletum commendetur, & speratus quoque euentus inter-



interdum sequutus, memoretur, is tamen lapidi adscribendus est minime.

Huc pertinet etiam *lapis fulminaris*, cuneiformis & interdum pyramidalis, quem vulgus credit decidere & fulminis miros effectus efficere, vnde a Germanis *Donner-Stein*, appellatur. Diu inter Physicos disceptatum est: utrum ejusmodi lapis in aëre generetur? Ego cum dubitantibus facio. Nam non opus est, talem fingere, quoniam omnes isti effectus a fulmine solum terebrante & concutiente fieri possunt. Id autem non plane negari potest, vi fulminis aliquando in terra materiam lapideam liquefieri, & in verum lapidem incertæ figuræ concreescere. Longe vero ab hoc distant, qui vulgo pro lapide fulminari habentur. Illi enim nihil aliud, quam artefactum sunt, quibus veteres loco cuneorum & malleorum ferreorum vsi fuere, de quo inter alia foramen, in vno latere amplius, in altero augustius, testatur. Reperitur hic lapis etiam in nostris agris, sed frequentius sine, quam cum foramine. Quidam ad lapides fulminares quoque belemnitem, sed falso referunt, cum hic potius testaceis petrefactis sit annumerandus. Virtutes ceterum nullas singulares habet, licet ad somnum provocandum, victoriam in prælio conciliandam & herniam curandam commendetur, & a plebejis domum, in qua servatur, a fulmine tutam reddere credatur.

Pergo nunc ad illos lapides, qui varias animantium partes referunt. Hi inter lapides cornuos non raro obser-

observantur, nuper apud amicum quendam plures videre mihi licuit: quorum aliqui pedes hominum, vertebrae, & unus præ reliquis caput canis, ore, oculis & collo excauato præditum, non male repræsentabant. Ipse possideo lapidem siliceum, coloris grysei, pugni magnitudine, cui in superficie alius accretus est, qui ranæ sedentis effigiem egregie exprimit.

Nec silentio hoc loco prætereundum, saxum eximie molis, ad pagum *Sennewitz* obuium, quod in superficie duarum manuum vestigia quodammodo exhibet, quæ a diabolo olim impressa perhibentur, eo scilicet tempore, quo templum in monte St. Petri a monachis exstructum, vno ictu hoc saxo conuellere voluerit. Ejusdem magnitudinis bina saxa, videri possunt, vnum prope *Wettinum*, alterum ad radices prædicti montis; vtrumque horum vngulam ostendit, quas vulgus iterum diabolo tribuit, saxis impressas, cum saltum ex vno in alterum fecerit.

Lusum naturæ porro agnoscunt quidam regni vegetabilis producta æmulantes lapides. Ex his primus est *dendrites*, arborum ramulos, muscum & frutices depictos exhibens. Talis in superficie lapidis arenarii *E-sperstadiensis* nonnunquam reperitur, non infimæ elegantie, de quo *BÜTTNERVS* in *Ruder. diluv. test. Tabul. XX.* specimen exhibet. Occurrit etiam *Bottendorffi*, in lapide cinereo fissili, qui per totam substantiam, quocunque modo diffractus, arbuscula subtilissima oculis offert. Huc etiam referenda erit altera topi supra allegati species, quæ *musco* similis est. Deinde *Zingiberites*, tam ratione figuræ, quam coloris, cum

D

radi-



radice zingiberis exacte conueniens, ad vineam, quam proxime Salæ fluuius alluit, item in agro Passendorf-fienfi, nec non limi fodina Loderslebiensi, & denique in strato decimo capitis primi reperiendus. Coronidis loco his adjungo peculiarem lapidem, inter reliqua curiosa dignissimum, quem prope Schrapelauium deprehendi. Hic alias multis ramis corallii fossilis scatet; sed præterea, quod notabile est, in disfractione contigit, vt accuratissime literam G, ejusdem fere magnitudinis & figuræ, representauerit; quæ in hoc lapide albicante, colore cinereo distincta, manifesto conspicienda & dignoscenda.

Exordior jam alteram classem lapidum figuratorum, qui specialius *petrefactorum* titulo digni, & partim ex regno vegetabili, partim ex animali originem ducunt. Necessarium autem iudicaui, vt paucis prius inquiram, vnde & quomodo ejusmodi testacea aliaque animalia & vegetabilia petrefacta in terræ viscera venerint, cum sæpissime talia loca a maribus & aquis sint remotissima. Nonnulli plane negant, hos lapides veras vegetabilium & animalium partes existisse unquam, sed eosdem, vt reliqua mineralia & lapides, generari in ipsa terra putant. At vero conjectura hæc est, nec unico firmo argumento demonstranda; quare a plurimis in historia naturali versatissimis viris merito rejicitur. Solido potius fundamento nititur illorum sententia, qui originem figuratorum horum lapidum ex inundatione partim vniuersali, partim particulari quadam, deriuant, quæ hæc subiecta inter arenas & varii generis terras ad diffi-

diffita loca translata, ibique postmodum pro varia constitutione loci & quam offenderunt matricis, a moleculis lapideis admissis, vel succo salino petrificante, indurata, crusta lapidea obtecta, vel in lapides penitus mutata fuerunt. His itaque præmissis, speciales titulos petrefactorum Halensium, & primo quidem ad vegetabile regnum spectantium, sequenti ordine enumerabo.

Principem locum sibi vindicat *lignum petrefactum*, cujus ad annum Elystrum, die Elster, tantam copiam deprehendi, ut vel trium centenariorum pondus superet; quare non abs re erit, si de hoc plura referam. Obtulerat nimirum amicus, mihi semper conjunctissimus, ante aliquot tempus mihi frustulum hujus ligni dono, cumque simul ejus locum natalem indicasset, statim conjeci, majorem forsan copiam ibi fore reconditam. Cepi hinc inquirendi ulterius propositum. Nec spes me fefellit. Quum enim hoc animo locum, qui paludosus erat, accessissem, mox superiori terræ strato remoto, totus arboris truncus, oblique jacens, oculis se offerebat, quem majoris curiositatis gratia, integrum domum transportare constituebam. Sed frustra. Aqua enim, ibi perpetuo scaturiens, hoc lignum adeo friabile reddiderat, ut truncus integer extractionem & transportationem non admitteret. Ideo tantum frustra ejus, majora tamen, ad longitudinem dimidiæ vlnæ, obtinui. Eruto hoc trunco, in distantia duarum vlnarum a priori, alium forte inueni truncum, erectius positum, non minus curiosum, quem itidem effodi & domum transportari curavi. Hoc fossile peculiare, uti ouum ouo, ita



ligno exacte simile est; ac color, striæ annos arborum indicantes & ramorum perfractorum vestigia, id manifesto demonstrant. Ceterum quædam hujus ligni fragmenta filiculis albicantibus pellucidis, instar crystallorum obsita sunt, qui splendorem illis conciliant. Durissimum quoque est, hoc lithoxylon, ut quibusdam cultris acuendis, loco cotis, seruiat. Silapidi autem arenario admouetur, per attritum impensio-rem, foetidissimum & nauseosum spargit odorem, quod non omnibus ejusmodi lignis solenne, sed singulare est. Ante octo annos in horto quodam Pædagogii, in superficie, mox sub limo, in arena, tale lignum petrificatum magni ponderis effossum est, quod non nisi colore a nostro priori differt. Post hæc minoribus fragmentis passim in nostro territorio repertum est (quod partim ipse, partim alii possident) scilicet in torrente Elystro prope Ermlitz, inter arenam ad riuulum, die Rheide, prope molendinum Discauiense, in strato subterraneo A. clbcccxiix. agri meridionalis, hinter den Kirsch-Garten in der Land-Wehre; in fossa quæ syluam proxime ambit; ad pagum Sennewitz, in agro, proxime ad riuulum quendam, & tandem in lapicidina Querfurthensi, prope Weidenbach; quod vltimum copiosius quidem est, sed non cum ligno exacte conuenit, & potius pro spato indurato haberi debet. Nec omit-  
tenda specimina in MYLII catalogo rerum naturalium adducta; ubi allegatur lithoxylon repertum prope Siebichenstein, no. 643. & 655. aliud ex lacu quodam Martisburgensi, Teuffels-Tümpel, no. 647. & 653. aliud vitrio-

vitriolo scatens Querfurthi, no. 646. § 656. aliud fossile bituminosum, *ibid.* no. 650. aliud *ibidem* no. 670. 672-675. & tandem aliud Halense no. 661. Nonnulli asserunt, quoduis lignum artificio breui tempore reddi posse lapideum; de quo duplicem fiendi modum descripsit KIRCHERVS in *M. S. tom. I. lib. V. sect. IV. cap. V p. 308.* & *tom. II. lib. VIII. sect. II. cap. I. p. 49.* Aliam adhuc methodum docet KENTMANNVS in *Nomenclatura rer. fossil.* fol. 39. his verbis: *Ex alno etiam fit lapis artificiose hoc modo: imponitur lignum, quanta velis magnitudinis, in labra illa ampla aenea, in quibus lupulus coquitur ad faciendam cerevisiam: cumque percoctus abunde lupulus est, eximitur idem lignum, & arena vel glarea in ipsis cellariis obruitur per triennium: inde cum exemptum fuerit, duratum in lapidem apparet: e quo potissimum cotes sunt, quibus ad ferramenta acuenda mensarii vtuntur.* Sic etiam de D. CLAUDERO, Con-Rectore Altenburgensis Gymnasii, pro certo mihi relatum est, illum ejusmodi liquorem petrificantem habuisse, quo omnis generis vegetabilia in lapideam substantiam transmutauerit.

Non a re alienum erit, si huic tractationi lignum fossile semi petrefactum quasi, & ipsos carbonēs fossiles Halenses, supra descriptos, addam. Quod prius attinet, jam satis patescit ex cap. I. quo loco, & quanta copia inueniatur: coloris plerumque est fusci, interdum etiam nigerrimi, quod posterius, aëri diu expositum, flores interdum exhibet vitriolici saporis. Vidi aliquando lapidem arenarium durissimum, ex proxima limi fodina erutum, in cuius medio particula hujus ligni



ligni fusci, ad pollicis crassitiem, conspicua erat, quod alias rarissime euenit. Nemo interim mirabitur, quod huc non minus carbones fossiles nostros, *Thau-Rohlen*, referam, quos alii tamen pro bitumine habent. Ex supra allatis enim circumstantiis abunde patet: illos primario vegetabili regno suam debere originem; licet non negem sulphuream ac vitriolicam eorum subinde indolem, quam tamen demum in terræ visceribus iis superinductam esse, censeo. Idem autem de veris carbonibus fossilibus, *Stein-Rohlen*, asseuerare non audeo, qui potius secundum plurimorum Physicorum sententiam, bitumen durum, nigrum & lapidosum constituunt, quare de his hoc capite non agam.

Sequuntur *Lithophyta*, siue plantarum varia genera in lapidem mutata. Hoc nomine nulla magis, quam *Manebacensia* & *Ilmenauiensia* hæctenus fuerunt celebrata, sed his *Wettinensia*, ante duos annos detecta, non immerito ad latus pono. Reperiuntur enim ibi in lapide fissili nigricante, *Schieffer-Stein*, elegantissimæ plantarum impressiones, ut primo intuitu statim rami filicis, polypodii, gallii, equiseti ramosi, arundinis striatæ &c. cognoscantur. Quin non raro omnes hæc species in vno lapide exprimuntur, quæ iucundum exhibent spectaculum, de quo gazophylacium curiosum illustr. Dn. PRÆSIDIS exemplaria habet nitidissima. Est quoque fissilis ejusmodi lapis grysei coloris in nostris agris prope *Giebichenstein* obuius, qui tamen obscurius & rarius quoque offert suas figurâs, quæ vt plurimum arundinis, equiseti

feti non ramosi, ac nonnunquam filicis & gallii, esse solent. Ibidem prope viam, in fossa & agro, multa marmoris fragmenta comparent, & inter hæc sæpius aliqua, arundine striata latiori geniculata, instar arundinis sacchariferae, distincta. Iam supra etiam dixi, nostris carbonibus multa folia fragmentaque lignea permixta esse, inter quæ folia salicis sunt manifestissima. Neque etiam omittendus est elegans *Fungites*, qui fungo, quem *Stein-Pilz* vocant, exacte similis est, & tam in strato decimo, sæpius citato, obuius, quam a me, sed minus nitidus, in campo est repertus.

*Incrustata*, sunt partes vegetabilium, topho, vel alia materia calcarea & terrestri obductæ, quæ vero longo tempore in lapides mutatae. Hæc incrustata in nostra regione valde infrequentia sunt, quia fontibus & aquis aptam materiam his generandis vehentibus destituti sumus. Nihilominus tamen ad ripas Salæ fluminis, inter aceruum arenæ, tale incrustatum reperi, quod ex pluribus arborum ramulis, luto cinereo firmiter obductis constabat. Hujus generis quoque aliud habeo longe præstantius, ex stramine, festucis & aliis quisquiliis compositum, quod cum aliis lapidibus in repurgatione putei cujusdam nostræ urbis copiose extractum est; quare huic puteo aliqua virtus incrustandi non immerito adscribenda, præsertim cum materiam calcariam in fundo vasorum copiose deponat.

Agmen petrefactorum vegetabilium claudunt *corallia fossilia*, de quibus integrum tractatum conscripsit BÜTTNERVS, sub titulo *Coralliographie subterranea*.



*rancea*. Non opus hinc est, ut plura de iis referam; cum omnes fere species, a citato auctore descriptæ & figuris æneis etiam expressæ, ad agrum quoque Halensem pertineant. Sufficiet potius nominatenus tantum allegasse præcipua corallia, apud nos passim reperibilia, vt sunt corallium globosum, fistulosum, asteriis punctatum, quod astroites dicitur, ramosum, & angulosum, retiforme & nodosum; quæ maximam partem lapidem corneum pro matrice agnoscunt.

Ordo ac instituti ratio nunc me ducunt ad lapides figuratos, ex animantium mutatione productos. Inter quos primum locum occupant *Testacea marina*, quæ sunt vel vniualuia, vel bivaluia; vniualuia iterum sunt vel erecta, ut belemnites & echinites, vel spirarum in modum contorta, ut cornu Ammonis & nautilites; vel turbinata, vt turbinites, strombites, cochlites, trochites, buccina, neritæ; vel non turbinata, erecta, vt tubulites & entalium. Et hac serie singula prius pertractabo, quam ad bivaluium divisionem progrediar.

*Belemnites*, sive lapis lyncis, in plurimis Physicorum libris inter lapides ex lusu naturæ formatos relatus legitur; ante paucos autem annos *Dn. D. EHRHARDVS* in *Tractatu* solidissimo de *Belemnitis Suevicis*, luculenter demonstrauit, ipsum ex profapia testaceorum animalium esse oriundum, cui sententiæ & ego calculum addo. Hic lapis paullo rarior apud nos est; nonnunquam tamen in limo occurrere solet. Vsum ejus veteres magni fecerunt in calculo, ictero, fluxibus ventris & pleuritide; & ex recentioribus

bus quidam huic lapidi eximiam vim adscribunt in febribus intermittentibus, si pulvis ejus cum aceto vini ante paroxysmum propinetur. Sed quod effectus hos laudatos re vera præstiterit, observatione & testimonio Practicorum non confirmatur. Interim tamen virtus absorbens & subadstringens, ipsi non penitus deneganda, licet etiam hæc ex aliis magis usualibus melius haberi queat.

*Echinites*, siue *Busonites*, in agris nostris frequentior est, & in vulgus etiam iam satis cognitus sub nomine *Kröten Stein*. Variæ dantur ejus species. Diuiduntur quippe echinitæ in globosos & oblongos; illi iterum in papillosos, & sulcis lineisue ornatos. Papillofi, siue fibulares, nunquam, sed sulcis notati ac oblongi non raro, inter filices reperiuntur, inter lapides corneos autem, invenire illos rarissimum est, & quidem in matrice, quare etiam tale specimen tanquam cimelium inter reliqua curiosa *Magnif. Dn.* PRÆSIDIS asseruatur, quod lapidicinis *E-sperstadiensibus* debet originem. Vires hujus lapidis quæ circumferuntur in praxi medica non sunt probatæ. Nudo affrictu oculorum inflammationes & rubores auferre, item virulentos morsus & tumores malignos curare & vt amuletum omnem virulentiam atque calculosos dolores præseruare dicitur; sed in omnibus hisce casibus vere quicquam conferre non valet.

Ad echinitas pertinet etiam *lapis Judaicus*, qui nihil aliud est, quam radiolus echini fibularis, quod præter alios egregie probat *D. WAGNERVS* in *diff. de*

E Lapid-



*Lapidibus Judaicis.* Inuenitur autem in areno fodinis circa Schrapelau, instar minimi modioli, candidus cylindraceus, nunc striatus, nunc tuberculatus. Postea non intrequenter in lapide corneo variis locis ejus impressiones instar cauernularum conspiciuntur, quale specimen exhibet BÜTNERI *Coralliograph. subr. pag. 46.* Substantia hujus lapidis est selenitica & quasi crystallina, cum particulis salinis intermixta, inde & inter diuretica & absorbentia refertur; cum vero simpliciora & efficaciora hujus generis suppetant, hoc tuto carere possumus.

*Nautilites* est testaceum uniuersae spirarum in modum contortum, ut nulla spira supra alteram promineat: concamerationibus gaudet hemicyclicis & siphunculo in medio posito: externa ejus figura naviculam quasi repraesentat, unde forte nomen accepit. Hoc fossile ex latomiis Querfurthensibus frequentius eruitur, & ordinarie per totam substantiam durissimo lapide est factum, nonnunquam tamen etiam materia pellucida crystallina ejus concamerationes sunt oppletæ. Præterea in Museo jam sæpe citato, alium nautilitem rariorem vidi, ex eadem ditione allatum, cujus interiora omni materia alia vacua, sed crystallis minoribus undique obducta ac desuper cuius concamerationi in medio loco siphunculi globulus crystallinus insidet.

A naulite parum differt *cornu Ammonis*, nisi, quod concamerationibus irregularibus, ramosis quasi & siphunculo ad latus posito, præditum sit. Dividuntur alias Ammonis cornua in spinata & non spinata.

spinata, quæ variis striis, modo serpentinis, modo rectilineis, vel tuberculis aliquando etiam ornata, conspiciuntur. In nostris autem oris, nempe in lapidicinis prope Weidenbach & præsertim Ruckenburg, tantum se offerunt cornua Ammonis non spinata, striis serpentinis dorsum perreptantibus donata, & sæpe quoque simplici & duplici tuberculorum serie obsessa. Hæc pariter ac nautilitæ, non raro fluore crystallino prægnantia sunt, ac plerumque matrici lapidis marmoreæ consistentiæ adhærent: quare ejusmodi cornua Ammonis rarissime in utroque latere manifeste expressa obveniunt. Notabile in genere de hac lapidina Kukenburgensi est, quod omni genere fere conchyliorum mirabiliter inter se concretorum abundet, ut sunt præter nautilitas & cornua Ammonis, pectinitæ, turbinite, cochlitæ, chamæ, mytulitæ ac aliæ, quale quid inter alios lapides non facileprehenditur. Aliquando etiam, quod curiosum est, in lapide corneo ad syluam cornu Ammonis, simplici spira exornatum, minimum inueni.

Excipiunt *Turbinite*, *Strombite* & *Buccinite*, quas cum parum inter se discrepent, junctim hic recensemus. Optimi & maximi habentur prope *Farrenstätt* & *Weidenbach*, alii vero minores in loco paullo ante nominato, & porro etiam ad pagum *Rölme* & *Lißkau* in calcario lapide, ac tandem ad albedinem calcinati, in arenofodina Schrapelauensi.

A turbinite non multum distat *cochlites* & *trochites*, quia pari modo turbinem, quamvis compressiorem, cum ventre ampliore habent, quibus adhuc



accedunt *neritæ*, qui ipiris paucis & mucrone parum aut nihil eminente gaudent. *Cochlites* prædictis jam locis, ac postea etiam in agro Passendorffienfi & Niedeblebieni, in lapide calcario, Islebiæ vero in topho reperitur; *neritæ* & *trochitæ* tantum in arenofodina Schrapelauienfi.

Quod restat testaceum univalve, non turbinatum, erectum, vel vno loco apertum, ut est *tubulites*; vel utrinque hians, ut *entalium*, occurrit utrumque in limifodina Loderslebieni & prædicta arenofodina.

Transeo ad testacea bivalvia. Hæc valvas habent vel æquales, vel inæquales, valvis æqualibus prædicta sunt musculites, mytulites, solenites, chama, pectinites, ostracites, bucardites, tellinites, trigonella & alia.

*Musculites* nihil aliud est, quam concha vulgaris fluviatilis *Farben-Muscheln*, in lapidem mutata. *Mytulites*, sive *mytilus* arcuatus, & *solenites* parum ab hoc differunt: repræsentant vero imaginem illius conchæ in littoribus maris obviæ, quibus in locis marinis instar ostrearum ex tempore vesci solent. Triplex hæc species copiose in omnibus latomiis Querfurthensibus, nec non in Liscaviensibus & in campis Passendorffiensibus reperitur.

Ibidem quoque *chama* aliis conchylis remixta occurrit; nullibi vero major & elegantior, quam in lapidina Kuckenburgenfi. Reperi nuper etiam Esperstadii corneum lapidem, in quo pars chamæ rugosæ subtiliter striatæ conspicitur, cum tamen alias his lapidibus testacea negentur a curiosis. Pariter quoque  
rarum

rarum existit, quod non ita pridem in crusta ætitis nigricante durissima prope Miedleben, duas chamas, totidemque pectinites minores detexerim, quale quid nondum accidisse memini.

*Trigonellæ* & *telling* sunt conchitæ minores, & iisdem locis numerosiores exstant. Hujus generis plures, sed calcinati, cum aliis neritis & cochleolis quondam sunt inuenti in nostra limi fodina, ubi in vnum locum quasi congesti erant, wie in einen Nest beysammen, ad integri manipuli quantitatem, quod mirum, eum alias in hocce limo ne vestigium quidem, conchyliorum prehenderim.

*Bucarditæ* rarioris sunt prouentus; exhibent figuram cordiformem, & a quibusdam non male ad conchas venereas referuntur. Interdum inter reliqua fossilia Querfurthi occurrunt; deinde & tres peculiæres ac majores ipsam martialem mineram constituentes, ex notabili strato nigro supra descripto productos vidi, vnus eorum malleo diffractus in cavitatem arenam ex fusco nigram exhibebat, alter per totam substantiam martialis indolis erat, tertius vero integer adhuc asseruatur.

*Pectinites* est concha æquilatera striata, & propter striarum similitudinem a pectine etiam nomen habet. Dicitur auritus, vel non auritus; ille rarior, hic autem prope Weidenbach & Ruckenburg, maxime frequens est, ita, ut quandoque in area vnus lapidis, quatuor, octo, quindecim & plures pectinitæ sese offerant. Tum quoque pectinitæ tales nummi instar & longe minores sæpe, in dicta arenofodina



prostant. Nec tacebo filices durissimos, cinerei & grysei coloris, qui copiosius ex decimo terræ nigræ strato erui solent, & minimis hisce pectinitis argenti instar splendentibus Silber-Muschelgen, admodum scatent. De ostracite, cum nostrum solum non agnoscat natale, hic nihil addo.

Propero ad bivaluia valuis inæqualibus, qui potissimum sunt sic dicti pectunculi lacunosi & non lacunosi, terebratula, gryphites. Ex pectunculis utriusque generis passim quidam in matrice modo dicti filicis obseruantur; gryphites vero, quod scio, huius loci nunquam; tanto frequentius tamen terebratula, siue concha anomia, & quidem prope Weidenbach, quæ cum lapide calcario laxè tantum cohæret, ut facili negotio separari possit.

Annumero denique testaceis Stellam marinam, quæ neque ad univaluia, neque ad bivaluia reduci potest, sed plane singularem speciem constituit. Figura ejus optime cognoscitur ex ROSINI Tr. de stellis marinis & ex D. BRÜCKMANNI Thesauro subterraneo Ducatus Brunsvic. Reperitur nullibi in nostro agro, quam prope Jarrenstädt im Lohbruch, & quia ibi etiam non admodum frequens, magni æstimatur. Corpus ejus non dissimile est aristæ Turcicæ, Türkisch Korn, vnde a lapidariis eine Korn-Mehre dicitur. Caudam hæc stella marina habet vnus vlnæ sæpe, mire flexuosum, cuius articuli entrochi, Bonifacius-Pfennige, & asterie appellantur. Ceterum quia huius testacei substantia selenitica splendens, cum lapide Judaico conuenit, eundem vsum in Medicina præstare poterit.

Su-

Supereſt, vt adhuc *Petrefactorum animalium* varii generis mentio fiat. Ad hæc primo referendi *piſces* in lapide fiſſili, cupreæ naturæ, *Rupfer-Schieffer*, cum ſquamis adhuc conſpicui, qui nullo loco forte frequentius occurrunt, quam in noſtro territorio. Tales enim exhibent metallifodinæ *Mansfeldenſes*, *Iſlebienſes*, *Bottendorffenſes*, *Wettinenſes*, *Rotenburgenſes* & quæ ſunt ad pagum *Schiebzig*. *Pal-* mam vero ratione magnitudinis, frequentię & elegantię reliquis præripiunt *Mansfeldenſes* & *Bottendorffenſes*, qui ſquamis aurei & argentei coloris inſigniter sæpe ſplendent. Genus horum piſcium variat, & non ſemper determinari poteſt: compertum tamen habemus, non tantum fluuiatiles & lacuſtres piſces eſſe, ſed marinos quoque, maiores & minores, de quo *MYLI Saxonia ſubterranea* teſtatur, vt taceam, quod ipſe non ita pridem *Bottendorffi* fragmentum piſcis marini, ſquamis quaſi plumoſis, *wie Federn*, exornatum, acceperim, qui, cum integer adhuc eſſet, longitudine vnam ac dimidiam, latitudine vero dimidiam vltimam, æquabat.

Pertinet huc etiam *Gloſſopetra*, quæ in arenofodina *Schrapelauienſi* ac interdum in lapide corneo reperitur. Eſt autem nihil aliud, quam dens piſcis canis carcarii, dicti *Hay*, maris mediterranei. In *Infula Malta* hæ *gloſſopetræ* ſunt copioſiſſimæ. Quo factum eſt, ut, quia hanc inſulam ſerpentibus penitus deſtitui ferant, nonnulli putarint, hiſce dentibus, perinde ac terræ *Melitenſi*, virtutem ſingularem alexipharmacam contra morſus venenatos & fe-



febres malignas inesse, quam tamen experientia non confirmat.

Alia dentis piscis marini species est, quam BÜTTNERVS in *Ruderibus diluvii*, test. p. 201. Tabul. 18. pro castanea lapidea venditat.

*Oolithes*, siue *Hammites*, a plurimis auctoribus pro congerie ouulorum piscium petrefactorum habetur, qua de causa hic etiam eius mentio facienda. Germanice appellatur *Fisch-Rogen, Stein*. Prostat ad lacum salsum, prope *Muhlödorff*, item in agro Rotenburgensi, nec non Alslebiensi, ubi tanta copia est, ut muris ac domibus exstruendis inferuiat. Si ouula sint maiora, dici etiam solet *Pisolithes*.

Sequuntur *Ossa animalium* partim petrefacta, partim tantum calcinata. Hæc nomen *Unicornu fossilis* obtinent, & ab illis in eo differunt, quod ordinarie albicantis coloris sint, & linguæ admota, adstrictorium edant effectum. Ossa vere petrefacta in plurimis lapidinis Quertfurthensibus matrici inclusa deprehendi solent, ut sunt vertebrae, costæ, maxillæ, scapulæ, tibiæ, &c. de quibus vide plura loc. cit. Tab. 32. 25. & 30. Unicornu fossile iisdem locis, sed rarius reperiundum, nonnunquam fusci & paulisper rubicundi coloris; in arenosodina autem magis albicans ac non infrequens est. Ante aliquot annos etiam ad pagum *Giebidenstein* maxilla elephantis eiusdem coloris effossa est; & in arena prope *Hornburgum*, ante quatuor annos, totum fere bouis skeleton, ad albedinem calcinatum, de quo cornu maximum, quod bouis Polonici simile est, in Museo rerum

rerum naturalium orphanotrophei Halensis asseruatur. Aliud ejusmodi cornu minus, quod rupicaprae fuisse videtur, non procul a pago *Bizthal* aliquando eruerunt. Præterea in *MYLII Catalogo num. 1459.* ebur fossile, siue dens elephantis duarum ac dimidiæ vlnæ, recensetur, qui in latomia Landsbergensi repertus. Ceterum quidam Physicorum & Chymicorum ossibus fossilibus mixtionem animalem denegant & pro sola terra margacea habent. At si figuram horum ossium & experimenta cum iis instituta conferamus, quod animali regno debeant originem, luculenter patefcit. Quam in rem inprimis legi meretur tractatus curiosus D. CARL, cui titulus: *Lapis Lydius*, quo euincit, hæc ossa fossilia, non secus ac alia recentia, destillatione præbere aliquid salis volatilis sicci & fluidi, & nonnihil olei empyreumatici; vsta dein in occluso nigrescere, aperto igne in albam terram vitrescibilem abire, e qua sal quoddam fixum elui possit; tum calcinata cum nitro hoc sal in alcalinum corpus redigere; ac demum parcius admixta vulgari frittæ vitri, vitrum semiopacum lacteum exhibere. Vnicornu fossile vsu medico, vti antecedentia subiecta plurima, non destitutum est, & propter substantiam terrestrem teneriorem & salinam, cum cornu cerui & ebore maximam partem conuenit, quare, vt illa, facultate subadstringente, absorbente & leniter diaphoretica pollet, ac in alui profluuiis, febribus & aliis affectibus commendari solet. *HOFFMANNVS* tamen in *Clauæ ad Schræd. p. 190.* monet: vt cum hoc prius in canibus, quam homini-



bus offeratur, instituat experimentum, quia cornua hæc fossilia sæpe aliquid veneni recondant.

## CAPVT V.

## De Salibus.

**E**X *Salium* numero pauca quidem, sed tanto præstantiora & medico vsui magis accommodata in nostra regione occurrunt, qualia sunt sal commune, nitrum, alumen & quodammodo etiam vitriolum.

Inter hæc salia primum examinabo *Sal commune*, quod nobis fontanum est, & tanta in copia ex salinis nostræ vrbi largissime scaturientibus coquitur, vt plurimæ adjacentes regiones nostra vbertate, suam subleuare possint inopiam. Actum vero agerem, si prolixius in fontium horum salinorum originem inquirere ac salis coquendi parandique modum enarrare vellem, cum de his & aliis circa rem salinariam notandis, ex instituto omnium optime jam scripserit illustr. Dn. PRÆSES in Tract. vom *Salz-Werk in Halle*, & eandem etiam in rem conferri possit HOHNDORFFIUS in der Beschreibung vom *Salz-Wesen*. Hoc tamen monere haud superuacaneum, originem salorum horum fontium non immediate ex mari, sed verosimilius ex sale fossili & terra salsa subterranea deriuandam esse. Quam sententiam egregie confirmat testimonium GEORGII AGRICOLÆ de *Nat. Fossil. l. 4. p. 514.* ita habens: *salis*

mon-

montes multi & illustres sunt in orbe terrarum. Extant tales in Germania juxta Seeburgum & lacum salsum, qua-  
itur versus septentrionem; sed non ceditur, quod ex hoc  
effluant fluvii, qui salis deferunt ramenta, & illi finitimæ  
regiones sint, quæ puteos habent salfos, e quibus artifices  
tam adfluentes aquas hauriunt, ut fossili facile carere  
possint. Idem VALERIUS CORDVS in Sylu. Obseru. te-  
statur: salsa terra est circa Seeburgum undique ad salsum  
lacum, alioquin dulcem, inficiens; Et paulo post: salsa  
terra, salsiq; campi sunt circa Langenbogen lacum, cu-  
jus aqua e salso fluit lacu: item Salzemunde, i. e. ad sal-  
sam mundam pagum. Ex quibus etiam facile patet  
ratio, cur non vnus & alter tantum fons salinus,  
sed plures his in oris reperiantur; ex quibus pro-  
ximi nobis sunt, qui offenduntur ad pagum Giebi-  
chenstein & oppida Gröbzig & Artern. Sic no-  
tum quoque est, varios puteos suburbii Glaucha  
& pagi Liebenau aquam eminenter salsam continere.  
De lacu autem salso Seeburgensi id notatu dignum,  
quod ejus salsedo neque augeatur, neque minuatur,  
sed mensura aquæ ex ipso semper tres drachmas sa-  
lis communis comprehendat. Quod tamen nullam  
aliam ob causam contingere arbitror, quam quod  
riuulus salsus, prope pagum Erdeborn, e cujus aqua  
ante plures annos coxerunt sal, in lacum hunc in-  
fluens, aquam ipsius, dulcem alias, salsedine inficit,  
alius vero e lacu egrediens riuulus, Sülzke dictus, al-  
ueo, ejusdem cum priori magnitudinis, tantundem  
semper aquæ iterum euehit, eoque ne salrior vn-  
quam fieri possit, facit, vid. *illustr.* Dn. PRAESES, l. c.



p. 20. Deinceps id quoque singulare & mirandum habet noster hic lacus, quod pisces in ipso nonnunquam copiosissime moriantur & ex profundo ad ripas propellantur; id quod nostra ætate anno MDCCLXV. factum esse meminimus, ita, ut opus fuerit, emortuos & semiputrescentes pisces curribus aliunde transportare atque terra obruere. Idem autem jam notauit VALERIUS CORDVS l. c. ita de hoc lacu perhibens: *Salsus ille lacus omni septennio turbatur: in medio enim ejus abyssus est, emittens ceu vsti bituminis & sulphuris fœtorem, quo totus inficitur lacus, adeo, ut pisces in eo moriantur, quotiescunque turbatus fuerit.* Vfus salis communis tam est necessarius, ut eo carere queat nemo. Constituit enim verum & præcipuum ciborum condimentum, quo alimenta cruda a corruptione vindicantur, cocta vel alio modo præparata sapida ac digestionem apta redduntur. Gaudet præterea virtute resolvente, abstergente & moderate stimulante, eaque propter clysteribus plerumque additur ad stimulandum. Cauendum vero est, ne nimia ejus copia, sub parco præsertim potu, ingeneratur, alias enim facile augendæ humorum acrimoniæ fauet. Ex præparatis ipsius est maxime spiritus salis, qui ad varios affectus, calculum, vrinam pellendam, appetitum excitandum & nimiam sitim laudatur, nec virtute destituitur insigni; quia tamen acor ipsius subtilis ac penetrans ad diffitas etiam in corpore partes operationem suam diffundit, ac nerveas maxime pulmonum membranas, moleste afficit & tussim mouet, cautus ipsius vsus sit, oportet. Ac  
quia

quia minus promte, quam alii acidi minerales spiritus, cum vini spiritu intimum init connubium, idem fere valet de spiritu salis sic dicto dulcificato. Externe aqua falsa vulnera & morsus canis rabidi ad arcendam putredinem abluere, haud inconsultum. In chymicis sal commune & ejus spiritus magnam præstant vtilitatem, & constituunt vnicum menstruum, quo aurum, reliquos soluentes liquores eluens, dissolvitur.

Altera salis species est *Nitrum*, quod apud nos copiose paratur in officinis nitrariis, *Salpeter-Hütten*, quæ erectæ in area suburbii. auf den Lerchen-Felde, & in pago *Teutschthal*. Terra nitri coctioni apta esse debet pinguis, sulphurea, salina, quæ ex tribus naturæ regnis, inprimis vero ex animali colligitur. Signa vero bonitatis terræ nitrosæ desumuntur ab operariis ex gustu; immissione ferri caudentis in ejusmodi terram, quod refrigeratum, maculas albicantes & subluteas ostendit, si nitrum adest; insperione siccata & in puluerem redactæ terræ carbonibus ardentibus, vbi strepitum & scintillas edere solet; & elixuatione ejusdem, quo lixiuio candelæ flamma ad siccitatem redacta, residuo dein ponderato, quantum nitri condatur, calculum subducunt. Omisso præparandi modo, me ad vsum ejus amplissimum in Medicina conuerto. Et certe nitrum inter medicamenta polychresta, magnæ, tutæ tamen, virtutis, principem fere locum obtinet. Aestum enim sanguinis temperat, biliosam acrimoniam cicurat, motus & excreções impetuosiores moderatur, do-



lores placide componit, resolvit, abstergit leniterque diuresin prorit, eaque propter in quamplurimis morbis effectum edit longe saluberrimum. Exhibetur autem ut plurimum ipsa in substantia depuratum, aut ad obtinendam resolutionem efficacior, antimoniatum, aut diureticam vim intendendam, fixatum. Spiritus dein ex ipso, vini spiritu dulcis redditus, inprimis methodo *illustr. Dn. PRÆSIDIS* paratus, antispasmodicum est præstantissimum & carminativum, ac in colica, calculo, aliisque doloribus, æstu interno, flatulentia, aliisque pathematibus summo cum fructu vsurpatur, tanto magis si cum appropriatis aliis remisceatur. Quid præterea nitrum in Chymia, Pyrotechnia & Oeconomia valeat, brevitatis ergo mitto; plura tamen videri possunt, in *Magnif. Dn. PRÆS. diss. de Nitro, & Illustr. D. STAHLII. Observ. Chym. Phys. Med. Ann. 1698. Mens. Mart.*

Ad nitri genus pertinet etiam *Aphronitrum*, siue flos nitri ex antiquis muris calcariis & in cellarum parietibus passim instar lanuginis efflorescens. Multum hoc a nitro vero discrepat, tam ratione saporis, quam coloris, nec adeo in usum medicum ducitur. Apud nos aphronitrum hoc ad pagum *Morsl* montibus accretum nonnunquam cernitur. Præstantius autem ac nitro nativo veterum valde simile olim (& hodiernum forte) repertum est *Leucopetræ*, *Weissenfels*, in cella quadam profundissima, tota in saxo excisa, e cujus summo aqua continuo depluens & fundum attingens, in nitrum durum & saxeum transmutata est, ut malleo vix obtem-

temperauerit ; imo parietes cellæ eodem nitro incrustati fuerunt , vti pluribus ex SCHELLHAMMERI *Comment. de Nitro cap. 3. p. 43.* SCHÜTTEYS in *Oryct. Jenensi* p. 88. refert.

*Aluminis minera* bituminosa , magna quantitate effoditur prope Dübén , quartum ab vrbe nostra lapidem , quæ in acervos collecta , & diutius aëri libero exposita , sal aluminosum in ingenti copia per coctionem præbet. Magma relictum libero aëri commissum per aliquot annos , denuo principium aluminosum concipit , licet non in tanta copia , vt antea. Curiosa est etiam observatio , quod minera prædicta in magnos acervos collecta , in apertas flammæ quandoque erumpat & fœtidum odorem emitat. Huic mineræ nostri carbones Halenses quodammodo sunt similes , tum ratione figuræ , tum etiam contenti , quippe qui aliquid aluminosi alunt , sed tanti non est , vt cum lucro elici inde possit. Alumen per se adstringentem & incrassantem edit facultatem , ob quam gargarismata adstringentia & liquores stypticos sanguinem sistentes ingreditur. Si vero vsum est , septicum constituit ad carnem luxuriantem absumenda. Internus ejus vsus infidus est ; attamen ex solutione aluminis , cum lixiuio alcalino debite mixta , colata & inspissata , sal neutrum , instar tartari vitriolati , præparari potest , tenerioris substantiæ , ac tanquam diureticum & aperitiuum valde proficuum. Sed reliquis ex alumine præparatis calere possumus. In arte tinctoria ejus vsus amplissimus. Nullus enim pannus , sericum , pili , coria &c.



&c. sine alumine colore quodam tingi possunt. Bibliothecæ etiam eo vtuntur inter aquas, quibus chartam immergunt & iterum exsiccant, zum Planieren, ne diffluat, vtque atramenti acrimoniam melius sustineat.

*Vitriolum* quidem in agro nostro effectiue non paratur; sed copiose tamen in vera minera martiali sulphurea latet, qua occasione illud hoc loco inferere volui. Minera hæc martis cum Hassiaca exacte conuenit, quare istam jure Halensem appellare possemus. Reperitur in notabili strato decimo, multoties laudato, ad vbertatem plurimum centum pondiorum, magnis sæpe frustis, instar filicum majorum, grysei coloris, & nonnunquam ligno fossili fusco circumdata; malleo vero diffracta, interior ejus substantia pyritosa flauescens, splendens, saporis fere nullius, in conspectum prodit. Minori quoque copia in forma globulorum occurrit. Ante octo circiter annos ex fonte XXX. vlnas profundo diuersorii in suburbio Glauchensi; zum guldnen Hirsch dicti, hæc minera inter arenam & argillam detenta variis globulis majoribus & minoribus eruta est, quorum sæpe duo, tres, imo sex in vna serie coaluerant. Postquam hæc minera aëri liberiori diu exposita, flauescente & cinereo colore obducta comparet, tandemque in puluerem grossiorem resoluitur, qui acerrimi saporis vitriolici est, ac si porro in aqua soluiur, inspissatur & crystallisatur, ipsum vitriolum martiale producit. Hactenus occasio quidem non fuit, variis aliis locis territorii nostri telluris viscera per-

perscrutandi, ac in campis meridionalibus per multos annos factum est; sed tamen credibile, hanc mineram martis vitriolicam latius se extendere. Id quod satis confirmant fontes medicati in nostris confiniis scaturientes, Halensis, Lauchstadiensis, & ante duos annos detectus ad pagum **Brachwitz**, qui omnes ex ejusmodi concreto martiali vitriolico virtutes suas acquirunt. Ex vitriolo varia in Medicina prostant medicamina, quorum vulgatissimum ac fere præstantissimum est tartarus vitriolatus, qui resoluit, abstergit, urinam, ac largior exhibitus, aluum, mouet: hinc in vitiis primarum viarum, febribus intermittentibus & obstructionibus glandularum a Practicis felici successu porrigitur. Vitriolum externe in oculorum affectibus, sub forma collyrii conducit, item ad hæmorrhagias sistendas, ac vulnera sananda, quam ob rem ex vitriolo etiam conficitur per orbem celebratus pulvis sympatheticus. Constituit quoque fundamentum atramenti, liquoris istius immortalis, quo viri eruditi nomina sua æternitati consecrare solent, cujus præparationem sequens distichon indicat:

*Vncia sit gallæ, semisque sit vncia gummi,  
Vitrioli pars quarta; his addas octo salerni.*

## CAPVT VI.

### De metallis & mineralibus.

**N**unc tandem ultimo capite ad metallorum & mineralium tractationem progredior. Etsi

G non



non pauca in agro nostro metallifodinae, pauca tamen metallorum genera, & nihil fere, nisi cuprum in illis reperitur. Interim qualiacunque sint, & vbi passim quoque obueniant, jam indicabo.

Si ab *auro*, metallorum nobilium primo, exordior, illud natium in granis inter arenas & illuuias Salae fluminis permixtum esse constat, ex quibus etiam lauari & colligi potest. Haec auriamenta sine dubio e montis piniferi, vulgo *Sichtelberg*, venis, perpetuo aquarum transitu, eluuntur & undis huius fluminis insinuantur. Hinc etiam fieri arbitror, quod iis locis, quae monti propinquiores sunt, copiosius, & quae remotiores, paulo rarius deprehendatur. Ita nouimus Salsfeldiae ac lenae quandoque ex arena lauatum esse aurum, apud nos vero nunquam, licet satis certum sit, etiam hic loci auri granula esse reperiunda. Multas alias & curiosas relationes de hoc auro habet SCHÜTTEVS l. c. p. 91. seqq. Vfus huius metalli medicus a nonnullis quidem maxime celebratur, experientia vero teste, tanti non est. Vnicum ex eo paratum, aurum fulminans, vere aliquam virtutem praestat, nempe resoluentem & stimulantem, propter quam aliis pulueribus salinis, vel pilulis commode additur, ad visciditates primarum viarum educendas, maximeque laudatur in epilepsia infantum a verminibus & aliis torminibus excitata; nihilominus tamen vbi acres humores in intestinis haerent, caute est adhibendum, ne vis ejus rodens inde augeatur ac damnum inferat.

Transio ad *cupri mineram*, quae, ut paulo antea, monui

monui, apud nos admodum frequens est. Licet autem nullæ magis, quam cupri mineræ variare soleant: in aruo tamen nostro habetur tantum duplex. Vna est in lapide fissili nigro, quæ occurrit in comitatu Mansfeldensi, ac Rotenburgi, atque etiam aliquot abhinc annis Wettini, nec non ad pagos Schiebzig & Brachwitz, erui cœpta est. Altera in lapide arenario varii coloris, præsertim viridis, quam vulgo Sand-Erz vocant, Bottendorffi offenditur, ubi tamen ab aliquot annis nihil cupri paratum, quod venæ metallicæ non admodum diuites, aquarum autem subterranearum nimius est prouentus. Ex omnibus metallifodinis, quæ tam in Saxonia, quam in sylua Hercynia, Mansfeldenses & Islebienses fere sunt antiquissimæ; quippe quæ ab anno MCIC. quobini metallifossore cupri mineram primum inuenerant, coli cœperunt ac subsequenter seculis vber admodum fuit earum prouentus. Hanc autem antiquitatem, præter historicam fidem, confirmant ipsæ fodinæ, die Zechen, ibi numerosissimæ, quæ longo temporis lapsu districtum duorum milliarium occuparunt. Ante bellum tricennale tam diuites erant hæ fodinæ, vt quotannis 20000. centipondia cupri largirentur, post illud vero, & in hunc vsque diem vix 1200 centipondia, cujus rei causa inter alia quoque ex defectu carbonum deriuanda. Quoduis autem centipondium cupri, ordinarie nouem, ad quindecim semiuncias (Loth) argenti continet: adeoque quatuor centipondia argenti circiter quotannis ibi conficiuntur. Vid. plura in MYLI Saxon. sub. P. I. p. 1. § seq. Cupri fodinæ, quæ non procul a Rotenburgo sitæ & no-



stris temporibus vix ante quindecim annos cœperunt, a Mansfeldensibus parum differunt, nisi quod loco lapidis fissilis, sæpe etiam cupri minera instar terræ nigrae paludosa, eruatur, ex qua ante plures annos coxerunt ibi vitriolum. Cupri usum medicum quod attinet, externe tanquam septicum in vlceribus fistulosis & excrecentiis vsibus chirurgicis quadrat, eaque propter in pharmacopoeis parata prostant vnguentum Ægyptiacum & Apostolorum, nec non virideæris. Quoad usum internum, ingreditur quidem, licet parua tantum quantitate, spiritum asthmaticum Michaëlis, saponem chymicum Dippelii, tincturam veneris, sed tutus nunquam ejus vsus internus & rectius ab eo abstinemus. Idem fere de præparatis ex argento ferendum judicium. Etenim bezoardico & tinctura lunæ, a quibusdam in mania & epilepsia commendatis, effectus non respondet & tucius iisdem non uti. Crystalli lunæ, vi drastica & rodente præditæ, itidem in hydropse tanquam diureticum inseguri sunt effectus; melius autem lapidis infernalis præparationi seruiunt, qui externe vt causticum vario modo applicari solet. Reliquos cupri & argenti vsus mechanicos breuitatis causa jam lubens prætereo.

*Ferri mineram* territorium nostrum tanta copia quidem non exhibet vt inde ferrum parari posset; attamen eam passim assatim absconditam esse, satis patet. Hoc enim pyrites vitriolicus martialis, fontes medicati & crocus martialis ex iis collectus; item rubrica fabrilis, ochra, & tandem ipsa ferri minera rubi-

bicundi coloris, & maxime in pulueris forma, mul-  
 migte Eisen • minera, licet pauperior, ante ali-  
 quot annos ad pagum **Brachwitz** reperta, compro-  
 bant. Tum etiam plurimi montes circa pagum **Gie-  
 bichenstein**, hoc principio martiali infecti, quod par-  
 tim ipsi lapides, ex illis auulsi, fusco colore tincti,  
 partim etiam crocus martis, quem riui ex his mon-  
 tibus profluentes deponunt, luculenter demonstrant.  
 Neque minus huc referendæ ætitæ, jam supra descripti,  
 qui proxime ad syluam nostram numerosi reperiun-  
 tur. Nam crusta horum nigricans & fusca nihil ali-  
 ud est, quam vera ferri minera, ne dicam, quod inter  
 illos quædam specimina quasi seminatiua ferrea ob-  
 seruauerim, quæ admota lima, ferri splendorem edi-  
 derunt. Hac occasione non possum non ferri natiui  
 plane singulare, & hætenus a nemine, obseruatum  
 specimen, commemorare, quod duobus abhinc annis,  
 in dulci patria mea, Potsdamii, in arenofodina, non  
 procul a granario publico, bey **Korn • Hause**, in-  
 ueni. Offendebam nimirum ibi lapidem corneum, co-  
 lore cinereum, in quo quum echinitem (quod ali-  
 quando accidit,) quærerem, eoque animo malleo  
 ipsum diffringerem, apparuit in medio tubulus pure  
 ferreus, ad pollicis longitudinem & calami scriptorii  
 crassitiem, huic lapidi firmiter accretus, quem adhuc  
 hodie inter reliqua, curiosa asseruo. Tubulus autem  
 hic utrum nativum sit ferrum, an vero arte-  
 factus, & casu, forsan inundatione, huc delatus ac ma-  
 teriæ lapidis tum molli immixtus cum ipso concreve-  
 rit? certo definire ambigo; posterius tamen videtur  
 magis probabile, quia ferrum in ejusmodi tubularem



figuram concrevisse exactam, vix credere licet. Ceterum mars, usu amplissimo, metalla antecellit omnia. In Medicina est præstans ipsius virtus tonica, roborans, adstringens & absorbens, propter quam in fluxibus nimis compescendis, sistendis febribus, in malo hypochondriaco, viscerum obstructione, cachexia, primarum viarum vitiis, omnibusque morbis, qui ab atonia proficiscuntur, non immerito mirifice celebratur, modo cum cautelis necessariis adhibeatur. Exhibetur autem tam in forma liquida, quam solida. In hac celebres sunt martis sic dicti croci, inter quos præferendi, qui minus adstrictivi magisque solubiles, uti est qui a STAHLIO nomen habet. Omnibus tamen palmam reddit dubiam simplex martis limatura, sulphure suo ignis tortura non orbata, a SYDENHAMO jam jure laudata. Ex liquidis martialibus sunt maxime tincturæ, quarum multæ, sed præstantiores, quæ lenes & tutæ, cum succis vegetabilium confectæ, ut cum succo pomorum, cydoniorum, citri. Ex aliis non ingloria est tinctura vitrioli martis tartarifata Ludovici, & tinctura martis Zwœlfferi, quæ posterior tamen pretio, non vero virtute, priorem superat. Externe a quibusdam laudatur aqua fabrorum ferrariorum in scabie, pedum oedemate ad aphthas infantum, ubi effectum edit adstringentem & repellentem, eaque propter cautione opus est. Laudatur etiam scopo exsiccante & consolidante crocus martis, vlceribus glandulosis ac manantibus inspersus si ante probe mundata fuerint, a PARACELSO & aliis practicis auctoribus. In mechanicis & œconomicis præterea ferrum, uti inter omnes constat, tantum non aurum & argentum utilitate superat, licet non pretio. Bellicus martis usus martis filii notissimus est, sed generi humano in perniciem innotuit. Ex



Ex reliquis mineralibus subiectis vnicum adhuc restat, *carbones nempe fossiles, die Stein-Rohlen.* Constant hi ex plurimum auctorum opinione ex bitumine duro, nigro, lapidoso, idque producta ex iis haud obscure comprobant: sunt tamen nihilominus qui eorum natales ex vegetabili regno deriuare malunt, & adhuc sub iudice lis est, quam vero hic componere non animus est. Interim ejusmodi carbones, siue lithantraces, eximia in quantitate occurrunt prope Wettinum & Lebeguinum. Priori loco ante triginta octo, posteriori vero ante quindecim annos, primum effodi cœperunt & tunc scripsit de his egregium libellum, Wettinensis quidam, BÜNTING, sub titulo *ghlua subterranea, siue von den Stein-Rohlen*, postea sub ulteriori telluris perscrutatione maxima horum carbonum fossilium supellex est detecta, ut jam in solo districtu Wettinensi tanta in copia quotannis eruantur, quæ octies millies complet illud mensuræ genus, quod nostrates vocant einen Wispel, aliquanto minor autem in Lebeguinensi, quin affirmant metallicolæ, in terræ visceribus apparatus ad centum adhuc annos esse absconditum. Differunt autem vtriusque loci carbones fossiles. Wettinenses firmioris & ponderosioris sunt substantiæ, ac plus de bituminoso sulphureo principio fouent, diutius eapropter in igne persistunt & flammam reddunt vehementiorem & constantiorem, vnde a ferrariis fabri s quam maxime vsurpantur. Lebeguinenes frustis majoribus eruntur, sed friabiliore, leuiore & minus constantes in igne sunt, tandemque in cineres abeunt, cum Wettinenses potius scorias valde compactas relinquant. Præterea Lebeguini in terræ superficie bituminosi carbones effodiuntur, quos Tage-Rohlen vocant, qui reliquis multo leuiore, molliore, & difficilius ignem concipiunt, nec, nisi ad calcem viam puriorem, Spatfalsch parandam, adhibentur. Ceterum inter veros illos lithantraces, præsertim Wettinenses, nonnunquam subtiliores laminæ sulphureæ, pyritis instar splendentes, wie Goldflitter, conspicuæ sunt, quæ de sulphuris copiosi præsentia testimonium præbent. Paucis abhinc annis in aliis



aliis locis etiam agri nostri, quæsiuerunt carbonēs fossiles metallifossiles, ut ad pagos *Morsl*, *Giebichenstein*, nec non in ipsa urbe nostra, uti supra memini, ac tandem ad oppidum *Gröbzig*, sed inani plane labore. Carbonum fossilium usus nobis frequentissimus & omnibus satis cognitus est. Utuntur quippe iis permulti loco lignorum, ad calefacienda hypocaustra & conquendos cibos, quem in usum tamen *Lebeguinen*ses commodiores, quia fumum non adeo ingratum sulphureo-acidum spargunt. Deinde tam *Wettinen*ses, quam *Lebeguinen*ses, in casis salinariis nostris, *Salz-Rothen*, salis cocturæ seruiunt, eoque maxima pars omnium, quæ effodiuntur, consumitur. Sunt, qui carbonibus hisce in Medicina virtutem aliquam anodynam, adstringentem adscribunt, eosque in puluerem comminutos, in febribus intermittentibus, hæmorrhagiis nimis, dysenteria & diarrhœa, imo externe ad sistendum sanguinem, commendant; sed rudior ipsorum compages & substantia copiosa sulphurea, salina, acida & terrea, plurimos Practicorum ab usu deterrent. Neque tamen illi audiendi sunt, qui eis vim plane deleteriam ac perniciosam tribuunt, ac propterea etiam vaporem lithantracum sanitati maxime aduersum proclamant, quam tamen opinionem jam dudum solide refutauit *illustr. Dn. PRAESES* in peculiari schediasmate de *Vapore carbonum fossilium innoxio*.

Hæc sunt, quæ de fossilibus agri *Halensis* recensere volui. Plura quidem subinde addi, aut pluribus describi potuissent, sed temporis ratio & præscriptæ dissertationis limites id vetarunt. Quam ob rem in succincta hac præsentis thematis deductione jam acquiesco, Deoque submissas ac deuotas exhibeo grates, quod hunc laborem perficere concessit clementer, simulque benignissimum ipsius Numen imploro humillime, velit hunc omnesque reliquos conatus dirigere ad prosperum denique

F I N E M.